

第三章 古代遺址

一、漢烽燧亭遺址 方余在L₁地之工作古塚也，復派兩組人四週探尋古蹟，懸賞以待。一組毛拉等三人，向西南行，期以二日。一組獵戶拉亦木東行，亦期以二日。余與脚戶則在駐地工作。諸人於四月二十三日上午出發，下午大風忽起，塵沙彌漫，如同黑夜，土人名此爲黑風。余棚帳幾被摧拆，至晚未息。想念出發諸人，均未帶皮衣，現憩息何所，聞風聲之怒嘯，遠慮諸人辛苦，不勝煩悶。次日上午，獵戶之子歸，告諸人無恙。未久，而毛拉等亦歸，略拾銅矢鏃之類，余心稍安。時大風雖息，而塵沙未減，遍地作黃色，寒冷異常。將晚忽瞥一騎馬人，身披大裘，戴皮帽，獵槍橫陳馬脊，左手執韁，右手秉櫛，踏蹠徐行，掠余帳而過。余異之，揭帳而視，非他，即余英勇之獵戶拉亦木得着勝利消息而歸。欣喜之餘，慰勉有加。而余在羅布淖爾最有名之發現，古烽燧亭遺址，隨拉亦木英勇之姿而出現於世矣。

漢烽燧亭遺址，即在土垠（音良）平灘上。（第一次、第二次路線圖L₁）北距得格爾約三百五十里，位於經度九〇，北緯四十五度十分，（此據同團陳宗器君所測）傍於海岸之三角洲，三面環水，惟北路通陸，形同肺葉。而此址即在其末端。四週土阜駢峙，如島嶼，如城郭。行人由西至東，或由東至西，至此城時，必須沿湖環行，越過土阜數重，方達到此址，蓋已至湖泊之中洲矣。遙望海中土阜重疊，迤邐若斷若續，似無數戰艦，爲避風濤之襲擊而停泊於海隅者。風起沙飛，類同烟霧，白鶴翱翔於天空，魚鳧遊戲於水上，洵爲海中奇觀。此處爲孔雀河末流所匯，故爲淡水。水極清澈，可飲可濯。過此皆爲鹹水，旅行家之來往東西者，咸憩息於此，爲通過艱險長途作準備也。此地適當漢通西域北道之衝，凡出入玉門關而至西域者，必須經此。以今揆古，其情實同。故當時在此設烽燧亭以護行人，乃必然之勢也。（附圖一一）

當余於四月二十五日之至遺址也，已近黃昏，不及視察。次晨興起，尙未及盥洗，而余僕人汗木多利，毛拉